



**16 September 2012**

## **Rampas pil tiruan RM1j**

Johor Bahru: Polis membongkar sindiket dadah mencampurkan pil pelangsing dengan serbuk ecstasy yang diproses menjadi pil tiruan, susulan rampasan pelbagai pil larangan bernilai hampir RM1 juta dekat Taman Desa Harmoni di sini.

Dalam serbuan jam 1.30 pagi Khamis lalu, polis turut merampas pelbagai peralatan menghasil dan membungkus pil serta pil khayal yang siap dibungkus di rumah berkenaan yang dijadikan makmal mini memproses dadah.

Turut dirampas sebanyak 2.8 kilogram ketamin, dua kilogram serbuk ecstasy, 970 biji pil ecstasy dan 740 biji pil Eramin 5 yang semuanya bernilai kira-kira RM713,000.

Tiga kenderaan termasuk dua buah bernombor pendaftaran negara jiran.

Penemuan beratus-ratus pil pelangsing jenis Atarax juga menimbulkan tanda tanya kerana pil itu dikategori ubat kawalan dan hanya boleh dikeluarkan dengan kebenaran doktor.

## **Tiga suspek ditahan**

Ketua Polis Negeri, Datuk Mohd Mokhtar Mohd Shariff, berkata dalam serbuan itu pihaknya menahan dua lelaki dan seorang wanita tempatan berusia antara 35 dan 39 tahun.

Polis tidak menolak kemungkinan suspek mempunyai kaitan dengan sindiket memproses dadah yang dibongkar pihak polis di tiga unit pangsapuri di Muar, minggu lalu.

“Rampasan dianggarkan bernilai RM1 juta dan dadah ini dipercayai untuk pasaran sekitar bandar raya ini serta mencukupi untuk bekalan 23,640 penagih dadah,” katanya pada sidang media di Ibu Pejabat Polis Kontinjen Johor, di sini, semalam.

## **Positif dadah**

Semua suspek didapati positif dadah jenis amphetamine, selain seorang daripada lelaki mempunyai rekod jenayah berkaitan dadah.

Mereka ditahan reman sehingga Khamis ini bagi siasatan mengikut Seksyen 39B Akta Dadah Berbahaya 1952 yang membawa hukuman gantung sampai mati, dan Seksyen 32 akta sama (Perlucutan Harta) 1988.

Mengenai sindiket dadah yang ditumpaskan di Muar, Mokhtar berkata, polis sedang mengesan Lim Wen Long atau Siau Loong, memegang MyKad bernombor 760301-01-5807 dan beralamat di 189, Jalan Jaya 10, Taman Jaya, Jalan Bakri, Muar.